

# INUIT ATAQATIGIIT

## Inatsisartuni



UKA 2018/9  
12. november 2018  
Stine Egede

**Inatsisartut Ombudsmandiata 2017-imut ukiumoortumik nalunaarutaata  
Inatsisartunit tusaatissatut tiguneqarnissaanik Inatsisartut  
aalajangiiffigisassaattut siunnersut.**  
(Inatsisinut Ataatsimiititalia)

Nunatta Ombudsmand-iata 2017-imi ukiumoortumik nalunaarusiorsimaneranut Inuit Ataqatigiinnik imattumik oqaaseqassaagut.

Siullermik Ombudsmand-i, sulisuilu qutsavigissavagut sulianut annertuunut, ilaannilu ilungersunarsinnaasartunut peqqissaarlutik sukumiisumillu sulisarnerinut.

Nalunarusiaq qimerlooraanni ilaatigut siumugassaapput suliat piffissartorfiusinnaasarsimasut, sulihammi sivisuumik ingerlasariaqartarsimapput.

Aammattaaq ilaatigut suliakkiissutit itigartitsissutigineqartarsimapput, suliassa qarfiup iluaniinnginneri pissutigalugit.

Suliakkiissutit ilai naammagittaalliutaasarpud ilaalli Ombudsmand-ip nammineerluni aallartitarisarlugit.

Susassa qarfiit pulaarneqartarsimappud, paasititsiniaanerit ingerlanneqartarsimappud, soorlu uani ilaatigut nunatta kujataanut angalasimanerit, illoqarfiit nuna qarfiillu ilanngullugit, naak sikorsuarnik peqquteqarnermik kujallerpaat tikiingitsoorneqarsimagaluartut.

Nunarput isorartoqimmat, inoqarfiillu avinngarisimmata minnerunngitsumillu aningaasat killeqarmata, paasinarpoq ilai tikiingitsoorneqartarmata.

Taamak oqariarluta, isumaqarpugut Ombudsmand-i nersualaartariaqartoq suliassa qarfik annertoq qularnaatsumik sukumiisumillu nakkutigilluarmagu.

Qularutiginnilarput Ombudsmand-imut saaffiginninniarnaq nuna tamakkerlugu ajornaatsuinnaanngimmat, taamaakkaluartoq filmeeqqamik kalaallisoortumik paasiuminartumillu ilitersuusiorsimanerannut qutsavigissavarput, neriulluta tamanut iluaqutaalluarumaartoq.

Nalunaarusiami immikkut maluginiarsimavarput qitiusumik allaffeqarfimmi oqartussa anermik aaqqissugaanerup aaqqitassartaqarneranik oqariartorneq, tamannalu naammassisimannngitsutut imaluunniit aaqqiivigilluarneqarsimannngitsutut oqariartuutigineqarnera.

Naalakkersuisut akissutaanni takusinnaavarput Naalakkersuisut tamanut takuneqarsinnaasumik erseqqissaassutiliorsimasut. Inuit Ataqatigiinniik kissaatiginartipparput paasissallugu illugiinnit (Naalakkersuisunit Ombudsmand-imillu) tamanna naammagineqarnerisq.

Taama oqaaseqarluta, qutsavigeqqissavarput Ombudsmand-i, nalunaarusiamullu imartuumut sulilluarsimaneranut. Tusaatissatullu tigullugu.

Qujanaq